

庚辰穀雨前一日以爲

靜丞仁兄大人四旬誕辰誌慶

陳寶鉞

弟關維恭拜贈

孟昭崑

曾文正公全集

第一卷
八冊

曾文正公批牘卷四

同治五年丙寅歲八月起北征行轅

安徽撫標振威營李鎮南華稟奉札查復蒙城募捐等情
蒙城瘠苦實較他處爲甚而苗捻積習濡染太深非廉潔剛正
不能挽回人心於萬一故查圩委員本部堂常常諄囑總以絲
毫不取於民爲立信之本麥捐等項所得甚微所失信者甚大
委員方嚴禁圩長不准有需索之弊城內紳董又傳令圩長代
寫捐輸不特圩長無所適從久之民間必疑查圩係爲斂費起
見實於圩務大有關礙不得不從嚴禁革至募民畏罪匿營該
鎮素與苗捻爲仇諒不至容畱此輩或有無知營弁收用匪人

如稟中所言者仰仍遵前札隨時訪查辦理該鎮從前身經百戰力保危城本部堂豈忍忘其大功而求其小過且孫部郎并無戰功僅能拒苗本部堂尙爲奏雪其冤該鎮拒苗旣堅戰功尤偉豈不知加意成全但須革除私捐拒絕匪人自保令名而後人皆愛惜而保全之也勉之毋忽

潘臬司鼎新稟賊在赫曹大軍由南路遏之較有把握等情

該軍二十三日行抵單縣可謂迅速張牛等酋尙盤旋於曹河之間未卽渡運東軍業已嚴爲準備聞李統領於十九日亦至濟甯刻下河水較深人心當可稍定不知運防究靠得住否該

司先赴嘉祥想與李統領熟商後卽已巡河北去專顧運防根本以慰東人之望劉軍門劉臬司等軍日內計已抵曹單一帶曹境三面皆水若各軍由南路過之使不得出收功較易眾議皆係如此然今年春閒羣賊皆在水套我軍甫將合圍而該逆旋又西竄特恐此次亦未能如願耳該司一軍總以力扼運河爲主前劉襄辦來此言賊若萬一不幸渡運只好反守運西驅之海東以圖殲滅本部堂雖勉強許之而猶諄囑其認真防運不可預作不幸之想劉襄辦當與該司道及矣運東二千餘里崇山峻嶺賊若東竄未必可以殲滅而擾害完善之區本部堂與閭部院暨該司李統領皆被東人怨憾公私有損故願該司

力主守運也

委辦蒙城圩務桂令中行稟查獲莠民李全信等九名訊

明正法由

墊賞錢八千已於另摺飭知徐臺矣近皖南劉鎮松山與宋鎮慶極爲和洽據宋鎮言蒙亳昔之從賊者邇來甚有悔心惟因查辦甚嚴不敢復歸蒙亳故土若稍邀寬典准其贖罪自新則蒙亳思歸者多捻黨可解散一半等語該令辦理圩務極爲認真成效已著仰細心查察如宋鎮之說可信則大猛之後濟之以寬以後不輕誅戮專令改過自新亦是一法仰會同朱令斟酌稟復

朱牧式雲稟報率營到臨淮日期由

敬營拔隊後該軍應以兩營紮於北岸一營紮於南岸守護米倉不可零星分駐前此防守臨淮各軍聲名俱好該守宜加意整飭營規嚴禁騷擾軍營之有聲名猶人之有衣服山之有樹木有則令人起敬無則十分可憎該守宜諄囑營哨弁勇人人自愛至囑至囑

襄辦軍務劉臬司秉璋函報探聽捻逆竄擾情形二件

十九二十兩函均悉前因賊黨分股竄擾本部堂檄飭銘鼎樹三軍追勦任賴等逆而令該軍會同鮑軍門劉鎮楊鎮勦辦張逆一股業經照會在案茲據稱該逆已向汝州北竄有窺伺河

洛之意該部應卽跟追西去貴襄辦志趣堅卓應趁勞乏艱難之時咬定牙根向前做去熬過幾次眾人自不敢輕量書生不耐艱苦矣

統領毅字營宋鎮慶稟防守黃河賊蹤偷挖未遂緣由防河之議順賈魯河以上直守至京水鎮爲止李撫部院來函亦係如此本部堂深贊其策勝於原奏之所議正擬興工分汛該逆又分股東竄只能暫緩河防先檄銘鼎樹三軍赴山東追剿矣其西竄之賊檄令霆軍與劉鎮之湘軍劉楊之淮軍跟蹤進剿昨准李撫部院函稱亦令該軍剿辦西路不知能會合諸軍力保河洛否至本部堂所部各軍惟劉軍門係建議守河之

人潘臬司贊成其事故責成二人修工守河均未嘗稍有推諉此外諸將則紛紛推諉均願游擊不願防河蓋防河者興工之時荷鋪負土十分辛苦不比游擊者之半行半住稍覺安逸防河者工竣之後保守汛地厥罪甚重不似游擊者易於報功難於見過故勇丁願行路不願挑土將領願做活事不願做笨事人情大類然也聞該鎮樸實耐勞向不取巧旣知守至京水鎮可保黃河大隄永無北顧之憂卽應躬任其難無令推諉者效尤可也

鮑軍門超稟軍抵汝州偵探賊情由

昨接永甯縣稟據稱九月廿二日賊撲該縣偃師縣稟則稱廿

五日賊又回竄宜陽西之三鄉鎮現在無論賊竄何處貴爵軍門總以力勦西路一股爲主總以本營專人確探爲憑各路地方官探報不足盡信目前賊勢東西分竄東路任賴較弱西路張逆較強此人人所共知者并非東路強而西路弱若霆軍舍張逆而尋任賴則外間必笑其尋弱者開仗則霆軍之名稍損矣貴爵軍門務宜專心西勦不可另作比較凡賊在豫境河南南陽兩府陝汝兩州均請跟蹤追勦若賊入秦省則不必越境勦辦貴軍此次入豫紀律嚴明毫不騷擾各處函牘無不稱讚此爲可喜惟尙未與賊接仗向來霆營敢戰之名外間佩服者多責望者尤重務須確探張逆所在痛快一戰以慰民望若因

山路崎嶇轉運艱難糧食不便行走稍緩則可改勦東股則不可也

委辦蒙城圩務朱令名稟稟復蒙邑現在情形

宋鎮之言是否可信本部堂前次所批本令該令等斟酌稟復并未據爲定論此稟所陳確有見地洵爲閱歷有得之言以後仍須認真查辦其有一線可原者苦口開導令其自新費一番工夫自有一番效驗否則多殺虎狼不爲損德多刈稂莠正以養苗總不使當捻者視同商賈出入自由乃可日有轉機至整頓營務亦非空言所能做到該令如查有真係捻首而倚仗營中爲護符者儘可指名密稟聽候酌辦

提督馬德昭稟挑築壕牆大概情形

現在西竄之賊去豫已遠東竄之賊如運防守住回竄乃意中之事京水鎮一帶隄牆目前究有幾分工程趁此無警之時實力修築所有牆高一丈寬一丈壕寬一丈深一丈五尺果能如式則屹若堅城該逆萬難飛越查各處工程皆與文書所限尺寸不符惟安慶金陵前挖圍城之濠山東今歲修運河之牆工作與文書相符貴軍門所分一段若做得十分堅實則各段皆可照樣爲之天下事總貴有賢者倡立好樣子也

王道成謙稟帶隊回開河駐防由

該道帶兵未久而前在費縣任內搜除積匪實能力遏亂萌此

次勦洗黃崖土匪辦理迅速仰蒙

恩命薦擢監司益宜加

倍謹慎力求實踐無論軍事吏事皆從勤廉二字做起勤則事之惰者無不舉廉則人之汙者無不畏刻刻以此自勵以此教人自有振興氣象目前運防雖可暫鬆逆匪渡運之謀狡謫百出該道防守開河仍須不分畛域兼顧他處冰凍之際深爲可慮不可一日忘戰也

老湘營劉鎮松山稟懇給發欠餉由

該軍請給欠餉本部堂上年十二月內批准由湘鹽局按月提銀一萬兩原令在於長沙就近設局派員經理嗣該鎮稟復局中難於分布按月派員領解來營陸續給發又經本部堂批准

以爲銀既有著早遲總可領到乃本年五月閒湘局之銀未到
來營候領勇丁在徐至九百人之多該鎮稟請發銀四萬五千
兩又經本部堂於每月一萬兩之外札飭徐州糧臺另發銀三
萬兩在案今該鎮復請於周口糧臺籌發銀三萬五千兩不言
借領竟似又另請添發者現在淮軍餉項去歲僅發八關今歲
僅發九關欠餉未補分文而銘鼎等軍追賊勤勞實過於湘軍
湘勇於滿餉之外又月給舊欠一萬已極優矣而該鎮多方設
法索取欠款殊不可解若謂號勇來營者多刁難追逼該鎮既
知湘勇如此刁難不應稟請添募四營本部堂亦悔不應准添
四營看此情景將來難免有唐金兩營徽休之變不如少一營

少一營之事端仰該鎮卽行派員至中途攔截無論行至何處卽在何處截住多給途費銀兩就地遣散回籍本部堂一面咨明湖南李撫部院如尙未起程卽在長沙遣散本部堂自統帶老湘營以來自問待該軍并無刻薄之處該鎮將此批鈔出徧示營哨弁勇可也

老湘營劉鎮松山稟懇仍准添設新四營以敷剿賊由新招四營業經湖北暫畱澠口設防昨已批令該鎮暫緩前往截止將來澠口撤防仍准赴豫省歸該鎮統領該鎮向來辦事頗有忠勇明決氣象前次請銀一稟未免太不知足深恐流入鄙瑣一路是以嚴批訓誡本部堂待人常如師之待弟子有戒

飭成全之意嗣後隨事畱心總要銀錢看得輕然後志氣振得起如果統領毫無私蓄各營將士無不共知其諒也

補用道王勳稟請咨商通行修寨由

湘省功名太盛元氣發洩漸少誠樸之風本部堂時切隱憂所可慮者不獨哥老會一端也哥老會傳染甚廣勾結秘密然以目前時勢而論挺身出爲戎首者或尙無人曾以此意商之李撫部院亦謂逐漸消弭可無大礙該道情殷桑梓具有遠識惟修築寨堡一層事經創始眾情必難允從且依山守險此是防禦外寇之事若本處內患一經築寨譬猶醫者之引疾入內會匪卽可憑寨以起事據寨以負隅防患而適以滋患亦非萬全

之策也候錄此稟函商李撫部院相機酌奪

鮑軍門超稟探聞賊又遁回京山天門德安一帶俟到棗陽後覘賊所向相機截擊由

初八初九十一三次來牘均悉昨准曾爵部院來函賊於十六日竄至義堂鎮離德安城四十餘里必向孝感大路奔竄此次貴軍門自行奏明先勦東股仍未與賊一遇朝廷必不以爲然本部堂籌畫月餘無兵入秦尤覺無以對秦人適接喬撫部院函稱霆軍若由荆紫關入秦轉恐逼賊愈西等語十一日已改檄老湘營劉鎮由潼關入秦該鎮十四接信十六拔營年內計必入關極爲迅速西路有此援兵已可慰秦中之望貴軍門

仍當勦辦東股能將任賴痛勦數次庶幾上可以對聖主
下可以免物議一切進兵之機宜就近與曾爵部院隨時熟商
本部堂與李爵大臣均不遙制惟捻匪狡猾異常我軍追勦宜
速進隊卻宜穩仍須步步顧定後路防其抄襲今年六月老湘
營在上蔡等處大戰聞貴軍門曾派人往看想已得其大概矣
至探報尤爲要緊最難確實貴軍九月十六自南陽拔營若徑
赴魯山儘可攔截張逆不令入陝乃因探報之誤繞至裕州失
此機會昨初十日至平林砦若趕緊進兵十二三日或可見賊
接仗乃因探報之誤十一日折回棗陽又失機會以後務須多
發探馬到處探問慎無輕聽人言也